

խաւ: Կռողները թողեցին մենամարտութիւնը, վազեցին իրանց երկպառակութեան առարկայի ետեւից:

Միթե՞ միեւնոյնը չպատահեց իմ եւ Սազոյի մէջ: Չէ՛, մտածում էի ես, նրա փոքրիկ գլուխը կը ջարդեմ, եթէ միւս անգամ նա կը համարձակուի Մարօի անունը յիշել: Ես ակելի թոյլ չպետք է լինեմ, քան այն ճնճողուկը, որ իր կեանքով պաշտպանում էր սիրոյ գաղափարը:

Նոյն րոպէին, կարծես, ես լսում էի մի հեկեկանք, կարծես, մի դառն լացելու ձայն զարկում էր իմ ականջներին: Ինձ թւում էր, թէ ես դպրոցումս էի, տէր Թողիկը չոքեցրել էր ինձ մանրած աղիւսի կտորտանքի վրայ: Ես տեսնում էի Սօնային (դասատան պատուհանից երեւում էր նա) միեւնոյն ծառի ստորի ներքոյ, ուր միշտ նստում էր, եւ այժմ նստած էր: Նա գլուխը քարշ էր գցել իր ծնկների վրայ եւ ձեռքով բռնել էր իր աչքերը. լաց էր լինում, եւ ես լսում էի նրա ցաւայի հեկեկանքը: Ինչո՞ւ էր լաց լինում նա, ո՞ւմ համար էր լաց լինում, ինչո՞ւ միշտ լաց էր լինում նա այն ժամանակ, երբ նրա հայրն ինձ ծեծում էր կամ գետնի վրայ չոքեցնում էր, իսկ միւս ժամանակներում միշտ ուրախ էր: Խեղճ աղջիկ, որքա՛ն լաց կը լինես դու, եթէ հիմա՛, հիմա՛ տեսնես ինձ...

Այս կիսաքուն, կիսաարթուն երազների մէջ էի ես, յանկարծ լսելի եղաւ մի սաստիկ դողդոց. որպէս թէ մի ծանր բան վայր ընկաւ գետին: Աչքս բաց արի, տեսնեմ իմ մահճի մօտ կանգնած էր վիթխարի Մըհէն եւ ինքն իրան մրթմրթում էր.

– Յազար անգամ ասել եմ, Եսպիսի յիմար բաներ մի տոռէ իմ ձեռքը. ինքը սատանան կը մոլորի, Էնքան թեթեւ է, հէնց շունչ ես քաշում, թոչում է ձեռքիցդ:

Վայր ընկած բանը փոքրիկ փայտեայ մատուցարանն էր, որի վրայ Մըհէն ինձ համար նախաճաշիկ էր բերում, նրա կարծիքով, իւր կոպիտ ձեռքերի համար անպատճառ մէկ ծանր բան պետք է լինէր, որ կարողանար տանել: Նա թողեց թափոած ամաններն առանց հաւաքելու եւ ուզում էր դուրս գնալ, երբ Մարօն ներս մտաւ:

– Ու՛՛՛՛՛, քոռանամ ես, այդ ի՞նչ արեցիր, սարսաղ, – դարձաւ նա դէպի ապշած սպասաւորը եւ սկսեց հաւաքել թափոած ամանները: – Եր՞բ պետք է դու մի բան սովորես:

– Ես ոչ մի ժամանակ չեմ սորվի այսպիսի սատանայական բաները, թո՛ղ կնիկներն անեն, – պատասխանեց նա կոշտ կերպով. – Դի՛ր իմ շալակին մէկ եզան բեռը ցորեն, ասա՛, Մըհէ, տար ջաղացը, կը տանեմ, մի հատ էլ